



UKA 2017/29

4/10-2017

Justus Hansen

**Uunga siunnersuut: Unammilleqatigiinneq pillugu Inatsisartut inatsisaata aamma nalunaarasuartaatitigut atassuteqarneq nalunaarasuartaatigullu kiffartuussinerit pillugit Inatsisartut peqqussutaata allanngortinneqarnerinik Inatsisartut inatsisaat nr. xx, ulloq xx. xxxx 2017-imeersoq. (Suliassaqarfinni aalajangersimasuni unammilleqatigiinnermik aqutsineq, attaveqaqatigiissutit elektroniskiusut nunanillu tamalaanik suleqateqarneq)**

(Inuussutissarsiornermut, Suliffeqarnermut, Niuernermit Nukissiuuteqarnermullu Naalackersuisoq/  
(Siullermeerneqarnera)

Demokraatini isumaqarpugut atuisartut pillugit killilersungaangitsumik unammilleqatigiilluni niuernerup nassatariumaaraa tunisassiat tamanut pitsaanerusut akikinnerusullu. Tamanna tunngavigalugu aaqqiissutissani pitsaanerpaasussaavoq sullissiumasut allat Tele Postimut unammillersinnaangorlugit ammaassinisq. Tunngavilersuut tamanna arlaannulluunniit attuumassuteqanngitsut Copenhagen Economicsip suliarisaani nalunaarusiami "Kalaallit Nunaanni nalunaarasuartaateqarnerup qilersorsimavallaarunnaarsinneqarnerata aningaasarsiornikkut inuiaqatigiinnut kingunissaanik misissuineq" -mi ikorferneqarnikuuvoq.

Tassani naqissuserneqarpoq, oqarasuaatit angallattakkat pillugit immikkoortoq qilersorsimavallaarunnaarsinneqaraluarpat inuiaqatigiit ukiumut 69 millioner koruunit 112 millioner koruunillu akornanni sipaartinneqartassagaluartut. Tamatuma qaavatigut unammilleqatigiinnerulernerup kinguneranik atuisartunut akit appassagaluarput aamma. Tamaattoqartartoq uppernarsereernikuuarput, interneti qilersorsimavallaarunnaarsinneqarmat.

Unammilleqatigiinnermut amingaataasumut kiisalu akinut qaffasippallaanut aaqqiissutissani pitsaanersaavoq nalunaarasuartaaserinermik qilersorsimavallaarunnaarsitsinisaq immikkoortumi allat Tele Postimut unammillersinnaasut aamma ammaallugit. Ajoraluartumilli taamatut alloriartoqarnissaa naalackersuisoqatigiit socialistiskiusut ajoraluartumik kissaatiginnngilaat. Tamatumalu kinguneraa innuttaasut tamatta assersuutigalugu angallattakkanik oqarasuaateqarnitsinnut sulii akisunaarunneqartuarnissarput. Uggornaqaaq kisianni Siumut, Inuit Ataqatigiit Partii Nalerarlu isumaqarput taamaattuaannartariaqartoq.

Sooq partiit taakku pingasut Naalackersuisullu nuarsuarmi akit qaffasinnerpaat ilaasa attatiinnerneqarnissaat aalajangiusimaneraat Demokraatinut paasiuminaaqaaq. Uangut



kissaatigaarput innuttaasut pitsaanerusunik akikinnerusunillu pisisinnaasariaqartut.

Taamatulli oqareerluta nassuerutigissavarput isumaqaratta siunnersuut manna ajunngitsortaartoq. Siunnersuut aqutigalugu avissaartissuagut oqartussaaffiit politikkimik piareersarfiusartut kiisalu oqartussaaffiit nakkutilliisut, neriuppugullu tamatuma kinguneriumaaraa nalunaarasuartaateqarnermi akit ammanerusut paasiuminarnerusullu. Siunnersuutip taamaasilluni unammilleqatigiinnissaq ammaappaa, tamannalu iluarilluinnarparput. Uggornaqaarli, nalunaarasuartaateqarnerup tamarmiusup qilersorsimavallaarunnaarsinnissaanut politikikkut sapiissuseqartoqanngimmat.

Taamatut oqaaseqarluta siunnersuutip suliareqqinneqarnissaa pillugu Inuussutissarsiornermut Aatsitassanullu Ataatsimiititaliamut innersuupparput.